

《奶茶仍是暖》

凌偉聰

第一幕

（在承興茶餐廳中，三名中年茶客在聊天）

茶客一：「佢又搞咩呀？成日都喺度改，改到天翻地覆！」

茶客二：「唔係咩？想當年我地咪又係咁樣讀書，可能當年嘅小學畢業仲叻過而家嘅中學畢業生呢。」

茶客三：「唉，都係勸隔鄰何生送豪仔到外國讀書吧，香港冇前景嘅啦。」

茶客二：「咁又唔駛，始終香港都係個家，啊，講起外國讀書，老闆個仔好似今日畢業返嚟㗎。佢就勁啦，喺外國修讀酒店管理，而家學成歸來，將老父嘅古老茶餐廳變成西餐廳，到時我地要返屋企沖奶茶啦，哈哈！（揚聲）係唔係啊夏老闆？」

夏老闆（廚房傳回）：「係呀！佢返嚟幫我手打理間鋪嘅，衰仔，咁耐仲未返嚟……」

伙計甲（加茶）：「喂！二叔，今日啲馬仔點呀？」

茶客二：「死晒啦！明明就中晒，爭最尾個隻，有冇搞錯……」

伙計乙：「咁你刨好的波未呀？今晚四大聯賽有大戰㗎！」

茶客二：「掂呀，我已經搵到條必勝 formula，今次仲唔賺返馬會一筆？」

伙計乙：「我都搵到條必勝飛㗎，一陣同你研究吓。」

茶客二：「嘻嘻，好呀！」

（一道門開啦，一個衣著整齊的青年拖著行李跑進來，是阿洋）

阿洋：「爸爸！爸爸！我返嚟啦！」

（夏老闆正在埋頭苦幹，聽不到）

女茶客甲：「洋仔！好久沒見啦！你好嗎？」

女茶客乙：「我係潘孀呀！以前日日請你食蛋撻嘅嗰個呀！你肚唔肚餓？請你食蛋撻好嗎？」

阿洋：「幾好！我認得你，你時時嚟茶餐廳傾偈嘅嗎！」

女茶客乙：「你仲記得我，哈哈！」

（阿洋見父親在工作）

阿洋（皺眉）：「爸爸！我先返屋企放低行李，再出嚟幫你忙！」

（夏老闆正在埋頭苦幹，聽不到）

阿洋（嘆氣）：「爸真辛苦……」

第二幕

（夜晚十一時多，茶餐廳只剩一個顧客，員工在結數）

夏老闆：「點樣呀？今日啲生意。」

的士佬：「算唔錯啦！仲有一件事，政府時時叫我地增值，我前排學左幾句英文，咩”哈囉”，”辜摩寧”，佢老母呀，今日終於派上用場啦！」

夏老闆：「真嘅？」

的士佬：「今日載左兩個外國人，我左一句”哈囉”，右一句”辜摩寧”，佢地俾錢嗰陣俾左我廿蚊作小費，太開心啦！」

夏老闆：「怪唔得你近嚟拿著本洋文書翻嚟翻去！」

的士佬：「夏老闆，而家環境唔好，你都學少少英文，佢真係可以” help”你嘅。」

夏老闆（連忙搖手）：「唔，退休日子都唔遠啦，仲學嚟做咩？」

的士佬：「哈哈，冇錯，老闆唔駛學英文都生意興隆呢，何況有個咁叻嘅仔，你真有福氣，唔早啦，我走啦！」

（的士佬離開，阿洋緩緩進來）

員工榮：「唉老闆，今個月嘅總收入又少左千幾蚊，要慳嘅都已慳左，廿幾年嚟我地也未嘗過咁樣嘅苦況。」

夏老闆：「唔駛怕，慢慢嚟，三十六年都咁樣過，只要我地每人出多一分力，承興定可渡過難關嘅。」

員工榮：「老闆，本來在十一點已經冇客人，可以收工，點解為左一個的士佬嚟浪費電力呢……」

夏老闆（笑）：「唔緊要啦，嗰個的士佬揸左成日車，交更又夜，冇飯食丫嗎，聽日你到銀行轉帳將錢滙入茶餐廳嘅戶口……」

夏老闆：「等我執埋啲手尾啦，你地收工先啦。」

阿洋：「嗯，老爸，辛唔辛苦？」

夏老闆：「當然唔辛苦。」

阿洋：「我睇見你每日都咁操勞，少左伙計，事事親力親為，咁好容易做出病嘅，但茶餐廳又毫無起色……」

（夏老闆沉默不語）

阿洋：「爸，自從我讀過外國啲套之後，我就覺得茶餐廳嘅經營方法係唔掂嘅。」（阿洋頓啦一頓，指手劃腳道出）

阿洋：「作為一個飲食行業，食物質素、員工服務及效率、清潔程度係十分重要嘅。喺食物方面，最緊要就係味道同埋健康，你睇睇我地嘅奶茶，糖份極高，仲有炒飯，整碟都係油，咁樣有損客人嘅健康啊。」

夏老闆：「嗯」

阿洋：「至於員工方面，要識得禮儀同埋效率要高，睇吓你啲伙計，記單又慢，又唔懂禮儀，每次拿食物時都將手指浸喺湯入面，又鍾意將單黏喺飯上，胃口都有晒啦。」

夏老闆：「唉……」

阿洋：「將呢度修葺一番，換過燈泡，重新請一班年青又平嘅伙計，再用電子記單嘅方式，冇耐必客似雲來，又或者索性將佢變成西餐廳，嗰時你就坐喺度賺錢，唔駛日夜勞累。」

員工榮：「老闆，咁我係咪要失業啦？」

夏老闆（憤怒）：「佢地跟左我幾廿年，唔通要我一次過炒晒佢地呀，佢地咁大年紀，炒左佢地佢地就有野做啦，你知唔知咩叫飲水思源？承興係我三十幾年嘅心血，冇左佢，你都出唔到外國讀書，即使虧本，我都唔會關門嘅！」

阿洋：「爸，呢度嘅客人只要一杯奶茶就坐足一日，我地咁樣係唔會賺錢嘅，一個成功嘅食肆唔係保本，而係賺錢啊！」

夏老闆：「唔得，我唔會咁樣做嘅！咳咳。」

員工榮：「唔好勞氣。」

阿洋：「爸，你冷靜啲，我地可以慢慢傾，但『轉型』實在係事在必行。」

夏老闆：「阿洋！咳咳」

阿洋：「爸，我而家返去計劃一下，遲啲話俾你聽，我上返去先。」

（阿洋離開）

員工榮：「老闆，年青人係咁樣嘅，唔好介懷啦！」

夏老闆：「我先唔會呢，唔……」

第三幕

（中午時份，在承興茶餐廳中）

伙計甲：「嘩，你地睇吓，對面快餐店排晒隊喎！」

伙計乙（抽著煙）：「學生都過晒對面食快餐，唉，開左成個月，都仲係咁多人。」

伙計甲：「都係做野吧！（輕聲地）你睇老闆做左成個上晝，仲未休息。」

（正當大家都在工作，阿洋突然走入）

阿洋：「爸！請你過嚟，我諗左一日，終於造好左一份『改造茶餐廳建議書』」

（眾人愕然，紛紛圍著阿洋）

（老闆走出）

夏老闆（憤怒）：「攞咩鬼啊！咳咳」

阿洋：「請你先聽我講，我係幫你嘅。你知唔知點解對面間快餐店咁旺呀？」

夏老闆（上氣唔接下氣）：「咳咳，你係幫忙……就唔好嚟……破壞我間鋪……」

阿洋：「爸，你真係唔聽我話？」

夏老闆（憤怒）：「你走，我唔聽你講！」

（阿洋無奈，轉身欲走）

員工榮：「老闆暈左！」

伙記甲：「快救人啊！」

（大家亂成一團）

阿洋：「快報警，扶著佢個頭！」

第四幕

（中午，在茶餐廳中，阿洋向兩位店員提示）

阿洋：「老闆而家人左醫院，茶餐廳嘅生意就靠你地啦，將我尋日教你地嘅全部發揮出嚟，等承興煥然一新！」

（伙計甲、乙點頭）

茶客二：「伙計！」

（阿洋點頭示意伙計）

伙計甲（垂手立正）：「午安，先生，請問要咩？」

茶客二（驚嚇）：「嘩！我去錯左地方咩？發生咩事？」

伙計甲：「你做咩著西裝呀？去飲呀？仲要帶圍裙？」

（伙計甲向阿洋瞟啦一眼，茶客二會意）

茶客二（狂笑）：「哈哈……咳咳，A 哈哈哈哈哈……午餐，咖啡，哈哈……」

伙計甲（垂手立正寫單）：「我重覆一次，一個 A 餐，喝咖啡嘅……謝謝惠顧。」

伙計甲（正想大叫）：「咖……（急忙跑到桌前記單，輕聲的），一個 A 午餐……」

（伙計乙走到另一枱）

茶客三：「做咩間野靜到死嘅？」

伙計乙：「讓我為你地加茶。」

（伙計乙垂手立正，左手放在後面，右手拿起大水煲）

茶客三（狂笑）：「嘩哈哈……你一邊加水，手一邊震，哈哈，一定好重啦！今日報紙上有咩新事件？喂，點解你地唔出聲？喂，喂！」

伙計乙：「唔好意思，先生，根據員工指引，侍應唔可以跟客人閒談，要專注工作。」

茶客三（無奈）：「咁仲係茶餐廳咩？真奇怪。」

茶客一（一飲奶茶）：「嘩，啲奶茶味唔同左嘅？」

伙計乙：「先生，因為茶包轉左，本來係大陸紅茶轉做英國紅茶」

茶客一：「吓，完全唔似奶茶嘞，又唔滑又有茶餐廳 **feel**，唔好啦，你俾個杯檸水我啦。」

茶客三：「攞咩鬼呀，我個乾炒牛河冇晒油嘅！乾”行行”點食呀？」

伙計甲：「唔好意思，先生，本餐廳已經實行健康食物行動，從今日開始，所有食物都係少油。」

茶客三（搔著頭）：「吓……但乾炒牛河少油，冇晒鑊氣，又唔惹味……」

茶客一（走過櫃檯）：「收錢呀！」

（員工榮走來計數）

茶客一：「嘩，駛唔駛計三次呀？」

員工榮：「多謝廿五個半，請問現金定係碌卡？」

茶客一：「你講笑咋？廿五蚊要碌卡？」

員工榮（無奈）：「我都係跟規矩做啫……」

茶客一：「痴左線……」

第五幕

（中午，外面下著細雨，在茶餐廳中，只有寥寥數客人，阿洋和榮工榮聊天）

阿洋：「唉，將近一個月，茶餐廳好似無起色……」

榮工榮（安慰）：「客人只係唔習慣啫！但畢竟茶餐廳有啲不倫不類。」

伙記甲：「係呀，佢地話啲野食唔中唔西，難食左好多啲。」

伙記乙：「佢地仲話我地 cool 左好多，唔同佢地傾偈，搞到食完野就要走，好悶啲。」

阿洋：「等我再檢討一下我嘅計劃……唔通新嘅唔比舊嘅好咩？究竟茶餐廳有咩吸引之處？」

榮工榮：「多的是啦，只要你喺呢度多留幾年，你就會愛上呢個地方……唔，我都唔識得解釋，好多人話俾我聽，茶餐廳好舒服，好似返左屋企咁，屋企嘅人對你未必有禮貌，但係佢地會好關心你，屋企既飯未必一定好好食好健康，但係每一條菜每一碗湯都係落足心機，好溫暖，睇吓外面，風大雨大，梗係最想返屋企啦，所以茶餐廳喺雨天特別多客！」

阿洋：「唔……我老豆都係好關心我。」

（阿洋沉思其間，有一老婦進來）

潘嬸：「阿榮，聽講你爸爸唔舒服入左醫院，佢好啲未？」

榮工榮：「啊！有心有心，佢快好番啦，多謝。」

潘嬸：「我煲咗豬肺湯俾夏老闆，喺，麻煩你送俾老闆飲，要趁熱飲先有效呀，我要返去煮飯，我走先啦！」

榮工榮：「謝謝妳。」

（隔鄰桌子有一男人，樣子疲憊）

兩小孩：「媽媽，媽媽！」

（兩小孩跑進來，後面住跟一個男人）

女人：「喂，你地好嗎？」

大兒子：「媽咪，我今日默書拿一百分！」

女人：「細佬，今日點解唔講野啊？」

男人：「佢今日偷偷寫情信俾女同學，比老師罰企啊！哈哈」

（小兒子掩面）

女人：「一個小學生，就已經向人示愛，果然夠膽色，哈哈，真不愧係你個仔！」

男人：「客氣客氣，你地想食咩？」

大兒子：「我要食炒飯，老師今日教我地整炒飯。」

員工榮：「好呀，食得飯多人都會快高長大！」

小兒子：「我都要快高長大！」

員工榮：「呵呵，廚房！揚洲飯多飯！」

大、小兒子：「多謝叔叔！」

阿洋：「榮叔，我請佢地食啦！」

員工榮：「好嘅好嘅。」

阿洋：「你好，我係夏老闆個仔。」

（飯菜到啦，大家開始進食，直至食完）

女人：「聽講承興就快要執啦，真係唔願意，我地快冇地方食晚飯啦。」

阿洋：「咁點解你地唔去快餐店食嘅？」

男人：「點同呢？呢度啲野又新鮮又夠鑊氣，奶茶啲茶又夠濃，快餐店啲野就好似執藥咁，冷冰冰，一啲誠意同人情味都冇，呢度呀，茶餐廳啲伙計會同你傾偈，講吓笑，雖然有時呢度係冇咁乾淨，啲伙記又唔識得禮貌，但係佢地個個都好好人，快餐店好似冇伙記嘅，周圍啲客食完就走，都冇人同你傾偈嘅，完全冇親切感，冷氣都凍啲呀。」

女人：「快餐店成日都好似想趕人走咁，坐耐啲都俾人話，呢度唔同呀，食餐飯都唔駛趕，我可以同兩個仔傾耐啲偈，感覺好溫馨。」

男人：「而家佢返早班，我返夜班，一齊嘅時間都唔多，若連食飯嘅地方都冇埋，真係唔知點好。好啦，我要開工啦！要聽媽咪話知道嗎？」

大、小兒子：「知道！爸爸拜拜！」

（又有五六中年人進來，每人的服裝各不相像）

員工榮：「你地又嚟嚟，一年唔見，好嗎？」

眾人齊聲：「同你一樣好啦！」

（眾人坐定，已急不及待聊天）

教師：「一年先嚟一次，但一次比一次少人……」

商人：「唔緊要，我上個月先撞到住喺二座三樓嘅阿楊，佢應承會嚟嘅。」

家庭主婦：「我在上個禮拜也見到三座一樓嘅珠珠，她屋企打算下個月移民到加

拿大啦……」

醫生：「我就係怕你地全都走晒，所以先拋低工作赴會。」

家庭主婦：「只要呢間茶餐廳唔關門，我每年今日都會到嚟。」

教師：「唔好講呢啲，近來點呀？」

（各人談天說地）

阿洋：「榮叔，佢地係邊個？」

員工榮：「佢地係老街坊，本來住喺對面嘅舊屋邨，後來佢地都各自出頭啦，而舊屋邨又拆左，所以佢地就決定嚟呢度聚會，記得佢地從前有好多人嚟嘅，仲有呀，佢地有次仲訂咗整間承興，所有枱都滿晒，嗰時亦係承興最興旺嘅年代，大約在……七零年代。」

（各人繼續談天說地）

家庭主婦：「諗起嗰時，我地先至十四五歲，就出出去做野啦，賺到錢就嚟呢度食一個 A 早餐，（指著牆上餐牌）哈哈！一樣係咁樣嘅配搭。」

教師：「比起而家，外面嘅政策層出不窮，卻愈搞愈死，特別係教育，我敢講，當年嘅中七畢業生肯定比而家嘅大學生更好。」

醫生：「我個診所喺附近，我朝早一得閒就嚟呢間茶餐廳食個 A 早餐，雖然明知啲食物唔係好健康，但係每次都會覺得好滿足，因為諗起以前同啲街坊小朋友三個人食一個餐嗰陣，哈哈，火腿要分三份……你地知啦，啲野爭吓爭吓特別好食 O 架嗎！而家一個人食一份，惟有一面食一面回憶啦……」

阿洋：「嗯……或者我明白啦。」

第六幕

（大清早，兒子扶爸爸回家）

夏老闆：「行快啲啦，我要開鋪門呀！」

阿洋：「我開咗啦，佢地都開晒工啦！」

夏老闆：「唔好啦，你帶我返去望吓先！」

（二人回到茶餐廳）

夏老闆（驚喜）：「嘩，嗰天花板光左咁多嘅？」

阿洋：「我叫佢地抹乾淨晒啲地方，客人都幾歡迎。」

夏老闆（嚴肅）：「你有改左我間鋪做西餐廳咩？衰仔！」

阿洋：「點會呀？我點會連屋企都執埋呀，啲客最受落就係你嗰套親切感，我梗唔會 cut 左呢個 selling port 啦，仲設計左好多新菜色，有炒公仔麵，粟米蛋撻，加啲『家庭套餐』、『家鄉炒飯』、『住家菜』等等，哈！必定好似嗰個牌匾一樣『客似雲來』！」

夏老闆（微笑）：「衰仔，自作聰明！」

阿洋（搭爸爸的膊頭）：「返屋企抖吓先啦！」

（夏老闆望一望茶餐廳，轉身和阿洋離開）

完